



食大梨享受幸福

轉秋咧！天頂个日頭還烈都分人佇毋著。冷氣緊吹，吹毋涼腹內个熱，一出門汗斯緊潑，烈烈个日頭焙地泥，烘爐樣个空氣，分人想望該涼涼、冷冷个感覺。斯恁泥，游泳池人尖人，冰店頭家笑微微。其實麼个游泳池、冰店，都毋當食幾坵冰過、涼涼又退火个果子入肚。該透心涼个感覺，該入嘴噴汁个願頭，你識試過無？現下東勢出產个大梨，斯係恁泥个幸福果。

俚大山嫲臂个東勢，係山清水淨个好所在，四時果子輪核開花、打子，葡萄、甜柿、柑橘，還過這下大出个梨。因致生長个條件好，所打出來个果子做下都又甜又香，毋單淨臺灣本島搶貨，外銷个定貨單也年年無斷。銷路好，耕種人斯心躍躍，相賽試種農業改良廠研發个新品種。市場大賣係肯定，單淨一個大梨，對早期酸甜酸中帶有一層澀个橫山梨到今，橫山梨頭接出來个新品類既經有成十種恁多咧！這係農民个驕傲，也係農業技術个進步展現。上天鋪排這清涼退火个大梨，產期對日頭烈烈个五月起勢，直直愛到八月半過正正式結束。新興、新世紀、豐水、幸水、4029、秋水、雪梨……，品類雖然多，產期也有長有短，毋過聰明个農民知得，生長期使得調整，麼个時節接仰臂樣个梨紅，還過愛經過幾久正有好收成。厥等掌握品種个特性，所以逐種梨絕對毋會做一到共下出現在賣場項。斯恁泥，在這熱都會發痧个季節，厥等接力个樣，陸陸續續帶分人清涼解渴个幸福。

大梨好食，毋過工也己多，東勢个梨農，新曆十一月斯愛開始無閒接梨紅个事頭咧。接梨紅係幼工，若係接無過斯愛過來一擺，毋單淨了工還過了梨紅錢，看係簡單事，認真做斯無恁該食。首先梨紅買來，愛一紅一紅削過，過後愛真細義定定接在橫山梨新綻个筍項。一筍接一紅，歸頭接撇，大約有八十到一百二十葩恁多，幾下坵田愛續核接，無已有耐心仰得佢撇？梨紅接過斯等開花，成個月過，接有過个斯會開白花，淡淡个花香錫著蜂來採蜜做媒人，天時無好蜂毋來，梨農斯愛自家搥哩啲，一蕊點撇換一蕊，阿姆哀，實在無恁該！花開一禮拜若有核斯會打子，這站時間天時若來作寒斯係壞事，因致愛祈求天公體恤厥子民，千萬毋好變面！花有核，打个子斯多，續落來係分人腰掛背吊个刪粒，一葩留得兩、三粒斯好，毋好軟心毋盼得，若無日後收成个梨會細粒又無價，該斯愛噉無目汁哩啲！粒刪好愛落(labˋ)袋，大體一葩落一袋，較工夫个斯會落兩層，看著黃袋在日頭下滿園閃光，做梨个農民定貼中有期待。

熱燻燻个天時，高品質个東勢大梨一入口，淦淦个幸福梨汁跔嘴角、手巴掌流往下，逐口都係梨農个心血，慢慢品嚐，你會食著該幸福个味瑞！

作者：劉玉蕉

☆詞彙學習☆

【潑(汗)】padˋ：大量流出(汗)。

【毋當】mˋ dongˋ：不如、比不上。

【願頭】ngienˋ teuˋ：癮頭。

【心躍躍】simˋ rhogˋ rhogˋ：躍躍欲試。

【梨紅】liˋ fungˋ：梨的花穗。

【幼工】rhiuˋ gungˋ：細膩的工作。

【接無過】ziabˋ moˋ goˋ：本文指嫁接失敗。

【筍】sunˋ：母株上新長的幼苗。

【葩】paˋ：一簇。

【刪粒】sionˋ liabˋ：疏果。

【落袋】labˋ toiˋ：套袋。